

己未詞科錄

已未詞科錄卷二

通議大夫廣東提刑按察使司按察使無錫秦瀛輯

傳畧

二十人 一等

彭孫通字駿孫號羨門生浙江海鹽人明御史宗孟孫
順治己亥進士授內閣中書舍人候補主事由禮部尙
書吳正治薦舉授編修歷官至吏部侍郎兼翰林院學
士著有柏悅堂松桂堂問月堂等文集南注香奩倡和
等集延露詞金粟詞

洪惟我

聖祖仁皇帝武功耆定六幕大同黼黻昇平右文稽

古旁求俊乂肇舉

制科於時

景運方隆人文蔚起懷才抱藝之士雲蒸鱗集成詣
金門司校閱者雖有李蔚杜臻葉芳藹馮溥四人而
甲乙次第皆稟

睿裁如王士禎池北偶談所記施閏章省耕詩中誤
書旗字爲旂字

詔降置次等一事仰見

睿鑒精詳不遺纖芥故得人之盛今古罕儔而孫逖
遭際

昌期實冠是選文章聲價紙貴一時今觀是集才學
富贍詞采清華館閣諸作九瑰瑋絕特知其獨邀

甄拔領袖羣才不偶然也孫逖所著南涯集香奩倡
和集金粟詞延露詞俱先有刊本惟全集未刊孫逖

沒後五十年至乾隆癸亥其孫景曾始爲開雕併以

舊刊南涯集延露詞附錄於後云

四庫書目松桂堂全集提要

彭孫遹海鹽人順治己亥進士官內閣中書舍人康熙

戊午開博學鴻詞科大學士吳正治以孫逖薦明

年三月

御試

體仁閣

親第甲乙取中五十人入史館充纂修明史官而孫
通爲第一識者謂制科不數舉與斯選者較春秋得
雋之榜爲難而冠倫魁能鬱爲選首則尤儒生不世
之殊遇也初授編修十年而至內閣學士兼禮部侍
郎旋晉少宰兼翰林院學士遂乞歸孫通工詩詞與
新城王士禎名埒時號彭王嘗步蕭寺寺僧方製疏
璃長明燈請爲賦孫通諾之僧退煮茗以餉茗未熟
而賦就著有柏悅堂集香奩倡和集金粟詞延露詞

行世

浙江通志

彭孫遹由編修歷簡少宰生平以文章上結

主知分校鄉會試者二充纂修總裁者三屢邀異數
室無一金之儲比致仕歸門戶寥寂直不異窶人寒

士云著有松桂堂集

嘉興府志

公自七八歲卽開口詠鳳凰至十五六已斐然成帙
順治甲午登賢書年二十四己亥成進士年二十九
旋以誤籍被累沈鬱困頓高臥滄洲者十餘年後乃
首光薦辟遭際

聖明出入

禁庭游登華要仕宦於朝者垂二十年凡生平所爲

欲歌欲泣可喜可愕之事無不見之於詩顧公當憔悴之時而其言憂而不傷公處貴盛之日而其旨淡而彌永蓋有得於詩人溫厚和平之意也讀之者可以油然而生感矣

徐孝穆
筆記

瀛按先生與其兄孫貽皆以文學著稱孫貽以諸生終而先生由中書膺薦舉冠其儕偶官至少宰余嘗過武原訪先生後人蓋寥落矣所著松桂堂集刊本尚藏其家

倪燦字闇公號雁園江南上元人康熙丁巳舉人由吏部尚書郝惟訥吏部侍郎張士甄薦舉授檢討請假歸

里著有雁園詩集

倪燦爲諸生卽以淹雅著名康熙丁巳舉鄉試應博

學鴻詞薦官檢討

江南通志

閻公所著明史藝文志序窮流溯源不下數千百言
可與姜西溟刑法序並稱傑作書法詩格亦秀絕一

時

全祖望
筆記

張烈字武承號莊持順天大興籍浙江東陽人康熙庚
戌進士_修補內閣中書由禮部侍郎楊正中刑部侍郎
任克溥薦舉授編修歷官至右贊善著有讀易日鈔六
卷王學質疑一卷附錄一卷攷堂文集二卷

烈之沒也門人私諡曰志道先生楊允長作私諡議一篇冠於此書之首昔宋儒張載之沒門人欲爲作私諡司馬光力言其非當時手帖猶載張子全書之首古人以禮處人不欲妄相尊重于國家易名之典其謹嚴如是允長等未之聞乎今錄是書而削除是

議用杜標榜之漸焉

節錄四庫書目
讀易日鈔提要

烈篤守朱子之說故集中多講學之文然而朱陸異同論王學質疑皆未免有鍛鍊周內之意不及其賈董同異論之持平蓋漢學但有傳經之支派各守師說而已宋學旣爭門戶則不得不百計以求勝亦勢

之不得不然者歟

節錄四庫書目
攷堂文集提要

張烈少聰穎讀書數行俱下長而潛心性命之學毅然以閑邪衛道爲己任登康熙九年進士授內閣中書十八年試博學鴻詞科選翰林院編修轉春坊贊善纂修明史典訓及四書講義諸書恪勤厥職編輯精當性至孝事繼母委曲承順人無閒言生平多所著述皆有關人心世道之文年六十四卒祀鄉賢

畿輔

通志

先生諱烈其先浙江金華府東陽縣人嘉靖時先生之曾祖始自浙遷居大興康熙丙午先生以易中順

天舉人庚戌登進士己未舉博學鴻詞授翰林院編修充纂修明史官乙丑六月陞右春坊右贊善自爲諸生以至立朝始終以清白自勵不屑世俗榮利純如也其學以程朱爲宗深疾陽儒陰釋之徒以閑邪衛道爲己任晚尤嗜小學近思錄故是書所發明皆從平生學問中流出非苟而已也

節錄陸隴其三魚堂文集

武承有王學質疑一卷其言陽明之病亦頗深切著明又著讀史質疑云明史道學傳可以不立初甚駭其論潛玩味之此言非孟浪

節錄陸隴其三魚堂隨筆

莊持預修明史分撰朱之馮金鉉史可法張羅彥羅

俊金毓峒等傳淋漓痛快極得史遷筆意

全祖望筆記

汪霏字朝采號東川一號亦齋初名王霖浙江錢塘人康熙丙辰進士授行人司行人由詹事府詹事沈荃薦舉改授編修歷官至戶部侍郎著有西冷倡和等集

汪霏丙辰進士補行人舉博學鴻詞改翰林院編修纂修明史辛酉典試陝西榜發皆知名士遷贊善擢祭酒盡革太學陋規歷遷內閣學士編纂佩文韻府成擢戶部右侍郎旋

命纂輯佩文齋歷代詠物詩在戶部時一塵不染主順天鄉試榜發論者稱其明歸田後杜門掃軌不與

戶外事霽性伉爽與人交不設城府不立崖岸人以

是樂親之

杭州府志

喬萊字子靜號石林江南寶應人明御史可聘子康熙
丁未進士授內閣中書由禮部主事趙隨薦舉改授編
修官至翰林院侍讀著有喬氏易俟寶應縣志使粵詩
文集石林集

喬萊字石林寶應人康熙己未

召試博學鴻詞官至翰林院侍讀是書雜采宋元後
諸家易說而參以己意前列諸圖不主陳搏河圖洛
書先天後天方圓橫直之說於卦變亦不取虞翻以

下諸家而取來知德之反對其解經多推求人事參以古今之治亂得失如謂履卦六三爲成卦之主而引莽卓安史解啞人之凶謂三百八十四爻惟離九四最凶而引燕王旦建成元吉高煦爲證謂小畜九三爲小人籠絡君子而引溫體仁文震孟近事爲說蓋誠齋易傳之支流假借牽合或所不免而理闕法戒終勝莊老之元談也於經文兼註古韻亦得失互陳如觀卦六四象下備引顧炎武方音之說則非未見音學五書者而象傳協韻仍從吳棫之舊則棄取有不可解者矣經文用王弼之本惟解上經下經繫

辭以下一概闕如蓋宗旨主於隨爰闢義故餘不及

焉非脫佚也

四庫書目喬氏易侯提要

喬萊寶應人可聘子丁未進士除中書舍人舉博學鴻詞改授編修主廣西鄉試歷陞翰林院侍讀時御史奏濬海口瀉積水總河御史上言䟽海口則引潮內侵大不便請於邵伯高郵閒置閘洩水復築長隄抵海口以束所洩之水使水勢高於海口則趨海自迅下廷臣議適萊入直

召問力陳不可議遂寢未幾中蜚語罷歸復

召卒於官

江南通志

先生湛深經學所著易俟不附會陳邵朱蔡嘗舉震
川之言曰本義乃邵子之易非孔子之易也以爲名

言
李集鶴徵
錄補輯

瀛按侍御有柘溪草堂林木幽勝先宮諭題其圖
所謂白田何連延柘溪清且漣者也先生旣罷歸
治廢圃曰縱棹園讀易其中寶應爲南北之衝名
公卿之過其地者觴詠流連無虛日嘗貽書曹峨
岫先生約竹垞稼堂蕩漁諸公暨先宮諭每年新
春渡江爲看梅之舉東南勝事於斯爲盛

賈崧按侍讀爲侍御叔子侍御年八十有雙白鶴

降于庭東南隱居之彥咸賦詩記其事母潘於明
之亡也流涕累日作絕命詩四章置衣帶間闔戶
自縊爲家人所覺故得免崧少侍先府君客柘溪
於李翁爾壽家得讀侍讀全藁蓋沈文慤選
國朝詩別裁集僅得其使粵一集也

王頊齡字顓士號珥湖江南華亭人御史廣心子康熙
丙辰進士授太常寺博士由吏部尙書郝惟訥吏部左
侍郎張士訥薦舉改授編修歷官至武英殿大學士贈
少傅諡文恭著有畫舫齋集世恩堂集西征草

世恩堂集三十五卷凡詩集三十卷經進集三卷詩

餘二卷項齡備

文治昌明之日奏太平黼黻之音故一時臺閣文章
迴異乎郊寒島瘦卽蚤年未達詩亦無衰颯哀怨之
意足以見其襟抱矣

節錄四庫書目
世恩堂集提要

王頊齡丙辰進士授太常博士己未薦舉博學鴻儒
改授編修纂修明史歷工部尙書武英殿大學士雍
正初以老乞休

世宗手敕慰留年八十四卒於位贈少傅諡文恭項
齡初以文學進洊歷卿曹諳練典故在政府八載恪

誠純一以風度稱

江南
通志

吳騫按文恭孫祖庚雍正丁未進士知山西興縣
乾隆丙辰爲山西巡撫顧麟薦舉鴻博報罷

李因篤字天生一字子德陝西富平籍山西洪同人布
衣由內閣學士項景襄李天馥大理寺少卿張雲翼薦
舉授檢討甫三日以母老乞歸著有壽祺堂詩文集三
十四卷漢書音注五卷詩評五卷廣韻正四卷

顧炎武作音學五書特載與因篤一札蓋頗重之聞
若璩作潛邱劄記則云杜造故事莫過於李天生然
所謂杜造故事者今不可攷則姑存其說矣是集爲
因篤所自定本三十五卷此本獨闕第四卷目錄注

云未出其爲因篤自剛之或爲隨寫隨刻誤排卷數
不得已而立一虛卷均未可知也其詩大抵意氣蒼
莽才力富贍而亢厲之氣一往無前失於粗豪者蓋
亦時時有之殆所謂利鈍互陳者歟節錄四庫書目
受祺堂詩文集

提要

李因篤年十一爲邑諸生丁明季之亂遂謝去肆力
爲古文辭尤長於詩歌嘗游長安仿少陵作秋興八
首見者多擊節時往來秦晉閒過從皆知名士康熙
十八年試博學鴻詞授檢討未兩月卽疏乞終養三
十七上始允歸抵家後侍母疾寢食湯藥每事躬親

越五年母沒遂不復仕性敏絕博極羣書又好汲引
後學問字者無虛刻顧炎武嘗集杜句題贈云文章
來國士忠厚與鄉人蓋實錄也

陝西通志

李檢討乞終養疏情詞懇惻比之李令伯之陳情殆
又過之是時通政司不肯上疏檢討乃自齋疏

午門外三日遂得

許終養逕歸富平不復出

節錄顧炎武撰墓志

關中李天生因篤己未鴻詞科爲三相國所薦至京
師名重一時容齋以同姓年長兄事之天生居之不

疑

阮葵生筆談

瀛桉先生與顧寧人先生交並高不仕之節薦舉
非其志也授官後寧人有答先生書云老弟雖主
令伯之章恐未見聽蓋知己之期之者厚矣

汪淮桉檢討父名暎林字暉天師馮恭定先生講
學績行卒後門弟子私謚貞孝先生檢討父死時
方三歲寇猝至門死者八十一人與弟迪篤從其
母田氏走外家得免檢討湛深經學學者稱關西
夫子

秦松齡字留仙號對巖江南無錫人順治乙未進士選
庶吉士授國史院檢討罷歸由內閣學士項景襄李天

馥湖督蔡毓榮薦舉授檢討官至左春坊左諭德著有
毛詩日箋六卷蒼峴山人詩集五卷微雲詞一卷蒼峴
山人文集六卷

同邑後學賈崧拜填諱

毛詩日箋六卷是編以紫陽集傳宗孟子以意逆志
之旨多不依小序因取歐蘇王呂程李輔巖諸家以
及明郝敬何楷近時顧炎武之言互相參核而以己
意斷之不專主小序亦不專主集傳凡有疑義乃爲
疏解亦不盡解全詩故曰日箋王士禎居易錄云秦
宮諭所輯毛詩日箋所論與余夙昔之見頗同其所
採取亦甚簡當

節錄四庫書目
毛詩日箋提要

秦松齡字留仙無錫人順治乙未進士入翰林罷歸
康熙己未

召試博學鴻詞歷官諭德嘗與睢州湯尙書斌講求
性命之學工詩古文與同邑嚴繩孫齊名而詩格尤
高所著有毛詩日箋蒼峴山人集行世弟松岱講學
東林尤邃於易著有周易晰微二十卷

一統志

秦松齡七歲讀中庸閉目潛思良久告其師曰吾識
性矣十九官庶常

世祖章皇帝

召試詠鶴詩有高鳴常向月善舞不迎人之句

指示閣臣曰此人必有品置第一以逋糧案累誤歸田旋以博學鴻詞薦舉侍從講幄纂修明史里居二十餘年研精宋五子書窮經尤邃於詩著毛詩日箋

江南通志

秦宮諭著毛詩日箋倣黃氏日鈔之例於諸家之說稍爲折衷其所採取亦甚簡當當爲序而傳之

王士禎居

易錄

對巖先生之從軍荆襄也大將軍延之講學先生談性命之旨與夫忠孝大義介冑之士俱爲悚聽官翰林日重人索額圖欲要之屢致饋問竟不報謝

華希閔劒

光閣
筆記

宮諭家有園在惠山之麓擅林泉之勝罷官後鍵戶
讀書與故人遺老倡和其中與漁洋爲同年友善常
緘詩一編題曰寄阮集

新刻棟高注
感舊集

瀛桉先宮諭蚤歲入翰林以族姑逋糧案呈吏議
比膺薦重入史館有明史稿四卷主甲子順天鄉
試得人甚盛中悲語罷歸康熙癸未

聖祖南巡給還原品有紀

恩詩二章所謂前事豈忘投杼懼

新恩終解拾塵疑者也曾伯祖南沙先生道然康

熙己丑翰林叔祖謚文恭蕙田乾隆丙辰探花從
叔泰鈞乾隆甲戌翰林迨瀛以詞賦應

召試

賜中書己未鴻博諸公後人科名鼎盛無如吾家
南沙先生著泉南山人詩文集困知錄文恭著五
禮通攷一百六十二卷瀛無似亦勉事問學不敢
墜其先業云

周清原字雅楫一字浣初號且樸又號蝶園江南武進
人國學生由左春坊左中允董訥薦舉授檢討歷官至
工部侍郎著有雁宕山遊記

周清原舉博學鴻詞授檢討歷官副都御史疏請革
舖舍飭刑具又請直省俱立育嬰堂收養棄孩俱得
旨允行

聖祖嘗稱爲孝子

御書孝經賜之遷工部右侍郎卒

江南通志

陳維崧字其年號迦陵江南宜興人諸生明左都御史
謚恭定子廷孫副貢貞慧子由都御史宋德宜薦舉授
檢討著有迦陵集二十卷湖海樓集三十卷兩晉南北
史集珍六卷陳檢討集二十卷烏絲詞四卷陳迦陵詞
集三十卷陳檢討四六二十卷

國朝以四六名者初有維崧及吳綺次則章藻功思綺堂集亦頗見稱於世然綺才地稍弱於維崧藻功欲以新巧勝二家又遁爲別調譬諸明代之詩維崧導源於庾信氣脈雄厚如李夢陽之學杜綺追步於李商隱風格雅秀如何景明之近中唐藻功刻意雕鐫純爲宋格則三袁鍾譔之流亞平心而論要當以維崧爲冠徒以傳誦者太廣摹擬者太眾論者遂以膚廓爲疑如明代之詬訾地寔則才力富健風骨渾成在諸家之中獨不失六朝四傑之舊格要不能以擗摭玉溪歸咎於三十六體也

節錄四庫書目陳檢討四六提要

陳維崧左都御史于廷孫由諸生舉博學鴻詞授檢討修明史最善駢體能於徐庾外自闢町畦詩詞皆工麗居官四年時以魚鳥湖山爲念疾革時猶吟斷句云山鳥山花是故人振手作推敲勢

江南通志

戊午春陳其年過崑山讀書余園適

朝廷開博學鴻儒科故大學士宋文恪公以其年名上余送之逾年

召試入一等授翰林院檢討纂修明史蓋自君祖太保公正色立朝爲時名卿贈公以貴公子用節概推重搢紳間中罹黨既遭亂後鑿坏肥遯著書自娛諸

所往還皆逋臣遺老君自束髮以來耳濡目染十七
歲補邑博士弟子員後隨侍贈公棲止山村野寺絕
仕進意久之隨輩應鄉試不利在中州徧交侯朝宗
徐恭士諸君如皋主冒徵君家最久君修髯美丰儀
風流倜儻所作歌詩隨處散落人間排宕豪肆遇花
間席上尤喜填詞於文最工駢體所作哀艷流逸每
於叙懷傷往俯仰頓挫愴有餘情庾開府來一人而
已

節錄澹園
集墓志

陳其年少有文名於江左數奇落魄一日過京口有
相士熟視良久曰君五十後當入翰林然不由科甲

人皆笑以爲妄或贈詩云朝來日者橋邊過見說功

名似馬周後果以博學鴻詞薦入翰林

古夫于亭雜錄

陳其年美髭髯氣沖而盛神晬以和才情志意如江河之浩浩莫可砥竭嘗與汪鈍翁論六朝之文詞雄旨冶鉤入深微多出諸賢尋賞之外時冒朴庵在坐傾聽不置陳遽掀髯謂汪曰與子納交十年今夕始稱知己又云張祖望曰其年其行敦篤而立誠其材浩瀚而英精其氣盤礴而靈淑

王時今世說

其年少清臞冠而于思鬚浸淫及顧準天下學士大夫號爲陳髯與字並行由是陳髯之名滿天下性落

拓視錢帛如土每出遊饋遺隨手盡空囊而歸所歷
南舟北轅橋危馬駭髯呬唔自如未嘗釋卷其於書
若嗜慾無不漁獵其文有散有俳俳體自喜特甚新
詩馳驟異前所爲詞尤凌厲光怪變化若神富至千

八百首前此作者未之有也

蔣永修
筆記

先生生而穎異十歲時代祖少保公作楊忠烈像贊
從學者爲貴池吳次尾吳門錢吉士兩先生一時名
公碩望如婁東雲間皖江等皆折輩行與交爭爲延
譽嗣與西樵阮亭旣庭甫草豹人孝威諸君子倡和
而學益進吳梅村先生有江左三鳳凰之目先生其

一也嘗自中州入都同秀水朱竹垞合刻一彙名朱陳村詞後流傳入禁中蒙

賜問文人榮遇自古罕有

蔣景祁筆記

瀛桉先生抱異才莠儻不羈龔芝麓送其遊大梁詞云君袍未錦我鬢先霜見者爲之墮淚未遇時屢遊無錫有重遊惠山寄暢園懷先宮諭詞云從軍年少巴陵客三載金笳畫戟蓋是時先宮諭方應蔡大將軍毓榮之聘從軍荆襄云

徐嘉炎初名焉字勝力號華隱浙江秀水人明兵部尙書必達曾孫國子監生候選州同由戶部侍郎于可託

薦舉授檢討官至內閣學士著有抱經齋集二十卷

徐嘉炎舉博學鴻詞授檢討庚午主貴州試稱得人累官內閣學士兼禮部侍郎嘉炎書過目終身不忘凡奇書逸典鴻覽之士未覩記者輒就咨焉著抱經

齋集

浙江通志

徐嘉炎晉閣學會秋讞上有傷人抵罪年僅十三請得緩法貧不自給典朝衣冬夏相易以爲常卒

賜祭葬

嘉興府志

賈崧校學士強記絕人九經諸史畧能背誦最熟左氏春秋祖世淳知隨州閭門殉難有春秋彙編

父肇森職方主事有三傳合編學士世其家學

聖祖嘗御書直西清頌樹影不隨明月去谿聲長
送落花來對聯唐張旭隱隱飛橋隔野煙詩幅

賜之

陸棻字次友號義山又號雅坪原名世枋浙江平湖人
康熙丁未進士授內閣典籍由兵部侍郎孫光祀薦舉
改編修官至內閣學士兼禮部侍郎乞歸著有雅坪詩
文彙十卷詩彙四十卷詞譜三卷選歷朝賦格十五卷
陸棻原名世枋平湖諸生入國學以高等授內宏文
院中書舍人復舉順天鄉試康熙丁未進士爲原官

尋管典籍十七年舉鴻博試一等改翰林院編修充
明史纂修官庚午主鄉試福建癸酉爲順天武鄉試
副考官保直南書房出五臺金蓮花限韻賦詩立奏
稱

旨三十三年

召翰詹八十九人試以豐澤園賦理學真僞論

上親閱卷取第一遂由官贊陞內閣學士兼禮部侍
郎一年乞休所著雅坪文彙十卷詩彙四十卷詞譜
三卷應試進呈詩文合刻一卷雜著若干卷

浙江通志

陸棻幼時大兵南下父被執奔救挾之北育於馬姓

器重之將議姻以先問名於楊辭歸完姻入太學由
中書中康熙丙午丁未鄉會試管內秘書院典籍薦
博學鴻詞改授翰林編修分修明史撰成祖帝紀漕
河水利藝文諸志主福建試所取士多名彥典順天
武闈自是倬直

禁廷

賜坐賦詩試皆第一超擢閣學嘗批紅本七七餘長
至奏勾決本請出矜疑二十餘人總裁諸書局高文
典冊多出其手

宸翰果饌賜甚優渥遽乞歸生平孝友天性伯兄南

雄守世楷先歿菜竭志承歡無倦族黨寄金者死遠
徵伊子歸封識如故還之篤於親知亟於地方利弊
喜唱酬嗜書卷壽七十

嘉興府志

馮勗字方寅號勉會又號葑東逸史江南元和人布衣
由庶吉士楊作楨薦舉授檢討著有葑東集

馮勗父館閩中勗與祖及母居歲荒乏食勗爲村塾
師得升斗奉養與妻采苴以食後父客死阻兵亂弗
獲歸櫬勗徒步入京爲諸侯客時徵博學鴻詞膺薦
得第授檢討卽請假歸入閩尋父櫬未得伏地慟哭
有老人哀之指視其處遂扶以歸

江南通志

瀛按先生以戊辰在京師朱竹垞方謫官招諸同年集六枳園對菊分韻賦詩竹垞有可怪南鄰馮檢討酒錢肯爲謫官慳之句後葑東亦緣事罷歸癸未以迎

駕復原官

錢中諧字官聲號庸亭順天昌平籍江南吳縣人順治戊戌進士選湖廣瀘溪縣知縣由庶吉士彭會淇薦舉改編修著有麓裋集湘耘編

錢中諧戊戌進士舉博學鴻詞授編修詩文雄瞻條

議三吳水利開濬劉河民利賴焉

江南通志

錢中諧學問淹貫爲諸生時請減蘇松浮賦條議三
吳水利皆切於國計民生詩文敏捷惜多散失兄鍊
字鍊百少受業於徐汧爲諸生試輒冠其儕

蘇州府志

瀛按康熙乙丑正月二十五日考試翰詹健菴徐
公列優等第一喬石林次之得甄敘而庸亭先生
與崔雪峯龐雪崖皆改調先生歸田後年八十無
疾而逝方渭仁云雪後嚴寒筆墨皆凍予以怔忡
力疾完卷尙廁前列忝竊極矣見松窗筆乘

汪楫字舟次號悔齋江南儀徵籍徽州休寧人歲貢生
補贛榆縣教諭由江寧巡撫慕天顏薦舉改檢討官至

福建布政使著有悔齋詩文正續集觀海集中山沿革
志琉球竹枝詞使琉球錄山間詩集

汪楫其先休寧人徙居儀徵少爲諸生知名與吳嘉
紀孫枝蔚並稱由贛榆學博應博學鴻詞之薦授檢
討使封琉球陞福建按察使尋遷布政使所著有中
山沿革志琉球奉使錄悔齋詩文正續集觀海集

通志

汪舟次兄弟好古力學名沸大江南北戶外屢常滿
父汝蕃意歎之戒之曰吾不願爾曹爲名士名如剪
綵鏤棘實不存也爾曹與人交以其文無寧以其行

郭泰之異茅容庾袞之敬緒德豈爲名高哉爾曹慎之又云悔齋性伉直意氣偉然通達治亂富于學問文章翰墨妙天下名公卿咸折節願交

今世說

俞樸按方伯僑居揚州少能詩與三原孫焦穫泰州吳野人齊名應徵所賦詩能獨用險韻初刻悔齋詩周櫟園爲之序迨遊匡廬得詩數十首藥地老人題曰山間蓋以清泉白石實聞此言之意因遂以此名集尤工書筆法奇逸渾脫淋漓如舞劍器

袁佑字杜少號霽軒直隸東明人康熙壬子拔貢授中

書舍人由詹事府詹事沈荃監察御史鞠珣薦舉改編
修官至左春坊左中允著有詩禮疑義左史後議老子
別注離騷荀揚文中子補注莊子注論杜詩注五鹿詩
選圖說史餘集補史集予省集警聞偶記霽軒詩鈔紀
程詩袁氏族譜

袁佑出拔貢生授內閣中書康熙己未試博學鴻詞
改翰林院編修歷左春坊左中允甲子典試浙江至
性孝友著述甚富於絲竹繁會中授簡揮毫灑灑數
千言立就

杭世駿
筆記

朱彝尊字錫鬯號竹垞晚號小長蘆釣魚師又號金風

亭長浙江秀水人布衣明大學士諡文恪國祚曾孫出
總督倉場侍郎嚴沆吏科給事中李宗孔薦舉授檢討
罷歸著有竹垞文類二十六卷瀛洲道古錄二十卷曝
書亭集八十卷經義考三百卷日下舊聞四十二卷明
詩綜一百卷詞綜三十四卷五代史注二十卷離志八
卷韻粹一百七卷靜志居詩話十卷

彝尊未入翰林時嘗編其行橐爲竹垞文類王士禎
爲作序極稱其永嘉詩中南亭西射堂孤嶼瞿溪諸
篇然是時僅規撫王孟未盡所長至其中歲以還則
學問愈博風骨愈壯長篇險韻出奇無窮趙執信談

龍錄論

國朝之詩以彞尊及王士禎爲大家謂王之才高而學足以副之朱之學博而才足以運之及論其失則曰朱貪多王愛好亦公論也惟暮年老筆縱橫天真爛漫惟意所造頗乏剪裁然晚景頗唐杜陵不免亦不能苛論彞尊矣至所作古文率皆淵雅良由茹涵既富故根柢盤深其題跋諸作訂譌辨異本本元元實跨黃伯思樓鑰之上蓋以詩而論與王士禎分途各驚未定孰先以文而論則漁洋文畧固不免瞠乎後耳惟原本有風懷二百韻詩及靜志居琴趣長短

句皆流宕豔冶不止陶潛之賦閒情夫綺語難除詞人常態然韓偓香奩集別有篇帙不入內翰集中良以文章各有體裁編錄亦各有義例溷而一之則自穢其書今併刊除庶不乖風雅之正焉

四庫書目略書亭集提要

彝尊初在布衣之內已與王士禎聲價相齊博識多

聞學有根柢復與顧炎武閻若璩頡頏上下

簡錄四庫書目

經義提要

朱彝尊少聰慧絕人書過眼覆誦不遺一字肆力於易書詩周官禮春秋左氏傳客游南北必橐載十三經二十一史以自隨歲己未以博學鴻詞徵試

殿廷取高等授檢討充

起居注日講官辛酉主考江南既而歸里後數年

駕巡河上至浙江

賜御書四字曰研經博物生平著書等身有經義考
三百卷曝書亭集八十卷日下舊聞四十二卷明詩
綜一百卷行世卒年八十

浙江通志

崇禎十年浙東西大飢人相食朱氏固巨族自其曾
大父文恪公以宰輔歸里無中人產至是幾絕粒顧
青氈舊物諷誦弗輟既而歎曰河北盜賊中朝朋黨
亂將作矣何以時文爲不如舍之學古乃肆力於三

禮左氏內外傳楚詞文選丹元子步天歌人皆笑以爲狂未幾亂果作年十七贅壻於嘉興馮氏馮公有客王鹿柴者華亭名宿也一見大奇之曰此必以詩名世自後名益高郡國諸侯聘幣爭集其門所至皆以賓師禮之旣以博學鴻儒徵

御試入高等以檢討充

內廷供奉辛酉典江南試稱得人嗣爲言者所中鐫一級尋復原官先生亦遂無世志退而著書皆鑱穴前聞參証已說卓然有傳於後無疑

節錄鄭方坤詩鈔小傳

老友朱笠亭謂集曰某聞之老輩海內有三圖其二

落梅里子知之乎集曰願聞其說笠亭曰一爲家竹
垞翁烟雨歸耕圖一爲秋錦先生灌園圖一爲陳迦
陵先生填詞圖蓋三先生皆命世才仗劍出門窮老
盡氣所交皆天下奇士胸中鬱律不可一世一題一
詠其詩詞其字畫盡古今之至寶也今填詞圖旣不
可得見歸耕圖亦歸他人之手矣

鶴徵錄
補輯

蘧梭先生於學無不博考證經史以及詩古文樂
府又無不工子昆田能詩蚤沒孫桂孫稻孫稻孫
嘗與乾隆元年鴻博科報罷今其後人不振曝書
亭藏書多散佚竹垞圖歸耕圖亦歸佗氏余備兵

杭嘉湖時嘗與學使阮公元嘉興守伊湯安重葺
曝書亭

賈崧按嘉慶丁巳在都陳伯恭祭酒出檢討填詞
圖索題又於翁覃溪學士小石帆亭觀歸耕圖卷
今爲錢戶部楷所藏則是三圖者崧得見其二矣

湯斌字孔伯號荆峴一號潛庵河南睢州人順治壬辰
進士除宏文院庶吉士外補江西嶺北道參政告病回
籍由戶部侍郎魏象樞左都御史金鉉薦舉授侍講歷
官至工部尙書崇祀賢良祠諡文正著有洛學編四卷
常語筆存一卷湯子遺書十卷附錄一卷補睢州志一

卷

斌在

國初與陸隴其號醇儒隴其之學篤守朱程其攻擊
陸王不遺餘力斌之學源出容城孫奇逢其根柢在
姚江而能持金谿新安之平大旨主于刻勵實行以
講求實用無王學杳冥放蕩之弊故二人異趣而同
歸今集中所載語錄可以見其所得力又斌雖平生
講學而康熙己未

召試以詞科入翰林故集中詩賦雜文亦皆彬彬典
雅無村塾鄙俚之氣至其奏議諸篇規畫周密條析

詳明尤昭昭在人耳目者矣蓋其著述之富雖不及

陸隴其而有體有用則斌尤通達於治體云

四庫書目易子

遺書

提要

湯斌睢州人自少卓立年十二聽里中耆儒王慕祥講小學侍坐終日無倦容順治戊子舉於鄉明年會試中式越三年壬辰成進士改庶吉士乙未出任監司備兵潼關陞嶺北道參政以計平大盜李廷玉後以父老乞歸里居垂二十年潛心性命之學渡河執弟子禮於孫奇逢歸而學養愈邃屹然中原鉅儒康熙戊午

詔舉博學鴻詞試入甲等補翰林院侍讀尋以日講
官直

經筵敷陳詳盡深契

聖祖意超擢內閣學士兼禮部侍郎巡撫江蘇斌莅
任後一以教化爲先痛除吳中積習禁服食玩好之
不節者尤嚴絕蒲博及拳勇鬪毆禁婦女毋遊觀取
五通神偶投於湖復親詣學宮命諸生講孝經俾幼
穉皆得列坐以聽陞禮部尙書掌詹事府益被優禮
每會議會推必問湯斌云何斌感殊遇凡是非可否
必侃侃正言幾爲忌者所中尋轉工部尙書以疾卒

於官域於學無所不窺而一以忠孝誠敬爲本其所
著書不爲空言有湯子遺書洛學編補睢州志明史
稟等書皆行於世

河南通志

公撫吳時有司請報湖蕩蓮芡公駁還固以例請曰
例自人作寬一分則民受一分之賜且蓮芡或不時
熟報部卽爲永額欲去之得乎吳縣監生王某有奴
竊貲逃出數年突引弓刀二十騎自稱鬻身親王府
詬罵索金錢公立擒赴獄論如律常熟奴某持其主
父嘗得隆武劄迫王遁欲據有王婦公曰國家屢更
大赦此草昧時事何足問迫劄焚之斃奴杖下常州

守祖朝進有惠政落職公奏留之祖製衣靴欲奉公
久之不敢言整刷未竟內擢禮部尙書掌詹事府事
在吳之日已有不便公所爲者以爲形已之短而忌
之入

朝後卒相擠排以沒人謂公廉直似海忠介而去其
煩苛精敏似周文襄而行方正至其所學純粹有體
有用則有非二公之所得而與者矣公之學主於隨
處體認天理其要歸於自得而外貌夷然不自矜飾
其學於蘇門也本崇姚江而不以先入之言爲主故

於濂雒關閩之書尊信尤篤

節錄濂園
集神道碑

歲戊午

詔舉鴻博戶部侍郎環溪魏公過予邸舍問今人才誰可舉者予曰公薦人與諸公稍不同諸公薦人文詞足矣公薦人卽非文行兼者不可聞睢州湯潛庵由檢討外遷潼關道副使以一羸載襆被在官數年疏水自甘去官日襆被之外無所增益自嶺北罷歸從蘇門孫先生講學躬行實踐教授生徒布衣徒步梁宋閒學者師之斯其人歟言未竟魏改容曰得之矣吾亦知其人聖賢之徒也明日遂疏薦之馴至大

用
錄

居易

順治乙未

詔選翰林科道出任監司先生名在選中有品行清
端才猷膽裕之

諭補潼關道副使治行爲關中最陞嶺北道參政甫
三日清積案八百餘件康熙甲子擢用江蘇巡撫到
任卽報蠲陞寧沐陽邳州賦數千兩又報捐泰州前
二年賦入永蠲案內奏免淮揚徐賦十餘萬又盡蠲
高郵寶應等州賦數十萬兩發常平倉粟賑饑貧拊
循細民若惟恐傷之者丙寅

皇太子出閣

上諭吏部古帝王諭教太子必簡和平謹恪之臣統
領宮僚專資贊導江蘇巡撫湯斌在講筵時素行勤
慎朕所深知及簡任巡撫以來潔已率屬實心任事
允宜拔擢大用風示有位特授禮部尙書掌詹事府
事先生聞

命卽日行吳人空一城痛哭叩轅門留先生遮道焚
香以送者數十萬人逾千里不絕

王廷燦
筆記

瀛棲文正爲要人齟齬幸荷

聖祖保全其官江蘇巡撫也過無錫必講學東林
書院比沒吾邑人祀之道南祠又祀之惠山周文

襄祠余官浙江其元孫懋修爲縣丞於浙問其家
世零落非昔廬墓且屢被河患懋修亦旋以母老
歸

賈崧按公學宗孫夏峰先生自言爲方面時居官
行政只遵寧陵呂叔簡從政錄行之不盡

汪琬字茗文號鈍翁一號玉遮山樵晚居堯峯因以自
號江南長洲人順治乙未進士授戶部主事遷刑部郎
中降補北城兵馬司指揮再遷戶部主事由左都御史
宋德宜翰林學士陳廷敬薦舉授編修乞歸著有鈍翁
前後類藁一百十八卷堯峯文鈔五十卷

古文一脈自明代膚濫於七子纖佻於三袁至啓禎而極敝

國初風氣還淳一時學者始復講唐宋以來之矩矱而琬與寧都魏禧商邱侯方域稱爲最工宋犖嘗合刻其文以行世然禧才雜縱橫未歸於純粹方域體兼華藻稍涉於浮夸惟琬學術既深軌轍復正其言大抵原本六經與二家迴別其氣體灝瀚䟽通暢達頗近南宋諸家蹊逕亦畧不同廬陵南豐固未易言要之接跡唐歸無愧色也琬性狷急動見人過交游罕善其終者又好訶詆見文章必摘其瑕類故恆

滿於人與王士禎爲同年後舉博學鴻詞時乃與士
禎相忤其詩有區區誓墓心豈爲一懷祖句以王述
比士禎士禎載之於居易錄中又與閻若璩議禮相
詬若璩載之潛邱劄記中皆爲世口實然從來勢相
軋者必其力相敵不相敵則弱者不敢強者不屑不
至於互相排擊否則必有先敗者亦不能久相支持
士禎詞章名一世不與他人角而所與角者惟趙執
信及琬若璩博洽亦名一世不與他人角而所與角
者惟顧炎武及琬則琬之文章學問可畧見矣

節錄
四庫

書目堯峯
文鈔提要

汪琬乙未進士戶部主事己未舉博學鴻詞授編修
峻立標望不諧於俗在史館兩月撰史稟七十五篇
杜門一年稱疾乞歸讀書堯峯益以文章爲己任論
者謂歸有光之後一人而已

江南通志

汪琬少孤自奮讀書五行俱下舉順治十二年進士
觀政通政司假歸銳意爲古文辭以起衰自命尋授
戶部主事分司大通橋進員外郎改刑部選郎中河
南民張潮兒以報母讐殺其族兄三春巡按御史論
潮死琬爲復讐論引律文罪止杖爲據以奏銷案降
北城兵馬司指揮兵馬司秩卑職冗在官者多偃蹇

不屑意琬剛直不撓理寃誣決疑獄懲奸豪任滿去
民炷香攜酒送者塞道復爲戶部主事權江寧西新
倉以病假歸結廬堯峯山益閉戶著書家居九年以
博學鴻詞

召試授編修與修明史告歸十年而卒年六十七琬
之爲文根柢六經浸淫史漢取法唐宋元明諸大家
立言命意皆有所本嘗自言吾文從廬陵人非從廬
陵出於易書詩春秋三禮喪服咸有發明其叙事尤
有法度一時名公鉅卿誌銘表傳必以琬爲歸性伉
直不能容人過雖賢人文士交遊遍天下而忌之者

亦衆自知不容於流俗故前後閑居二十餘年泊然
自樂也所著鈍翁類稿百十八卷自刪定爲堯峯文
鈔五十卷並行於世

蘇州府志

鈍翁性狷急不能容物意所不可雖百責育不能掩
其口其所稱述於當世人物之衆不能數人

今世說

鈍翁讀書勵志行內自重有守又善彊記過目終身
不忘舉進士官戶部浮沈郎署位不副志發爲著作
原本經術晚築室堯峯之麓幅巾杖履與山樵野叟
行歌互答當道大吏求一見不可得也嘗語人云士
大夫行己不可無本末讀書不可無師承立論不可

無依據同
上

瀛校先生少可多否與崑山歸莊寧都魏禧山陽
閻若璩互相詆諆其古文辭一洗明季蕪穢之習
直接歸太僕與先官諭爲順治乙未同年進士交
善先生之謫兵馬司指揮也先官諭以詩送之云
輦下故人誰左掖東吳名士半南冠時先官諭亦
方以望逋糧案被黜在籍旣又同膺薦辟今先生
後衰弱其墓幾毀於豪右郡人爲請於官得全聞
之吾友王芑孫云

周春校康熙甲子

聖祖南巡還次無錫

召撫臣湯斌

諭曰汪琬久在翰林文名甚著近又聞其居鄉不
與聞外事是誠可嘉特賜

御書一軸

邱象隨字季貞號西軒江南山陽人參政俊孫次子淮
安衛人順治甲午拔貢由監察御史羅秉倫薦舉授檢
討歷官至洗馬著有西山紀年集

邱象隨參政俊孫次子年十四卽工詩才名蚤盛與
兄象升有淮南二邱之目以拔貢生應博學鴻詞科

特授檢討入史館纂修歷官至司經局洗馬性孝友
未仕父歿廬墓三年通籍後追承先志積俸置田爲
宗祠春秋二祀費族人稱之

江南
通志

賈崧按西軒洗馬爲喬石林侍讀妻弟李惺庵閣
學爲洗馬之甥同膺薦辟入詞館與修明史人並
榮之洗馬從子迴號拙村乾隆丙辰亦舉鴻博爲
江蘇巡撫顧琮所薦報罷迴子謹雍正癸卯拔貢
柱乾隆己未庶常刻其詠物詩行世兄象升字曙
戒順治乙未進士官大理寺丞王漁洋尙書志曙
戒墓云與弟官洗象隨齊名號二邱毛西河檢討

嘗云孝友醇謹吾不如二邱

己未詞科錄卷三

通議大夫廣東提刑按察使司按察使無錫秦瀛輯

傳畧

二十名 二等

李來泰字仲章號石臺江西臨川人順治壬辰進士兵部觀政授工部主事出督江南學政補江南蘇常道參議裁缺候補由監察御史鞠珣薦舉授侍講著有石臺集十五卷蓮龕集四十卷

李來泰壬辰進士授工部虞衡司主事出督江南學政已而巡視漕河復整飭蘇常水利農務裁缺歸里康熙戊午以博學鴻詞徵明年授翰林院侍講卒於

京邸所著有遊龕集四十卷并史館諸傳藁

江西通志

先生文不肯一語猶人詩獨以平正通達行之能者

固不拘一格

沈德潛 國朝詩別裁集注

賈崧按侍講年十二爲郡諸生十八歲食餼於庠
衡文者爲嘉定侯峒曾有英絕領袖之目

潘耒字次耕號稼堂江南吳江人布衣由左春坊諭德
盧琦刑部主事謝重輝薦舉授檢討以母憂歸著有遂
初堂詩集十五卷文集二十卷別集四卷類音八卷

詩分少遊夢遊近遊江嶺遊海岱遊台蕩遊閩遊黃
廬遊楚粵遊豫遊臥遊諸草分年編次文則各以體

分惟爲二氏作者入之別集用楊傑無爲集例也未
性好遊名山足跡甚廣其詩不事雕飾直抒所見古
文蹊徑較平稍遜於魏禧諸人而氣體渾厚空所依
傍則未所獨得也家吳江爛溪少受業於顧炎武頗
得其傳故詩文皆有原本特其議論之文徃徃反覆
求快太傷于盡未免失之好辯焉

節錄四庫書目
述初堂集提要

潘耒舉博學鴻詞官檢討纂修明史以母憂歸不復
出幼有聖童之目試以歷日首尾不遺一字兄樾童
有史才耒承受家學復從顧炎武徐枋戴笠遊故其
學貫穿淹洽無所不通旁及歷術算數宗乘道藏悉

有神會

江南通志

潘耒幼穎異讀書日百行下初從兄樸章學又師事徐枋顧炎武淹貫羣書工詩古文辭尤長史學康熙十七年以博學鴻詞徵試授檢討纂修明史以史事重大條上四議總裁然其說令專撰食貨兼訂定他紀傳充

日講起居注官纂修

實錄

聖訓壬戌爲會試同考官得士十二人皆天下選後二年甄別議起忌者坐以浮躁降調遂歸四十二年

上南巡復原官大學士陳廷敬欲薦起之力辭而止
未有至性事母孝居喪哀毀骨立於師門之誼尤篤
徐枋隱居數十年家計蕭條臨沒以孤孫相託未爲
謀置生產又捍衛其外侮顧炎武所著日知錄多經
世大業未刻之始得傳於世

錢霑
續志

陸翼王極口潘次耕之博洽曾于健庵所見之不誣
也

節錄三魚
堂隨筆

瀛按先生父凱字仲和名與復社周之夔者與諸
君子構難作復社或問馬君常張天如兩先生並
力爭之兄樸章及同縣吳炎皆高才會湖州莊氏

史既作牽連被逮死

錢泳按檢討於諸徵君中齒最少顧亭林贈詩云
聞有二毛人年纔三十二者是也

沈珩字昭子號耿巖浙江海寧人康熙甲辰進士候補
內閣中書由大學士李蔚杜立德馮溥薦舉授編修乞
歸著有耿巖集耿巖文選

珩字昭子海寧人康熙甲辰會試第一人

殿試二甲第一人授內閣中書舍人已未薦舉博學鴻詞

召試授編修是集皆所作雜文不標卷帙但以體分

其目錄題耿巖文鈔初集而卷端則題耿巖文選每篇自爲起訖不相聯屬疑校刊未竟之本偶然印行非其全也

節錄四庫書目耿巖文選提要

沈珩海寧人康熙甲辰會試第一未釋褐而歸凡十五年不仕至戊午以博學鴻詞薦試入格授翰林院編修充纂修明史官辛酉副順天主考亡何乞假歸珩淡於榮利素好古手不停披嘗輯一書曰十三經名文鈔凡所屬綴菑畬經訓無一切游談不根語有耿巖集若干卷行世

浙江通志

施閏章字尚白號愚山江南宣城人順治己丑進士刑

部觀政授本部主事累遷至江西湖西道參議裁缺候
補由大學士李蔚杜立德馮溥薦舉授侍講遷侍讀著
有學餘堂文集二十八卷詩集五十卷外集二卷雙齋
詩話二卷矩齋雜記二卷青原志畧補輯十三卷年譜
四卷施氏家風述畧一卷

王士禎選感舊山木二集所錄閨章詩最多又取其
五言近體八十二聯爲摘句圖見所撰池北偶談中
閨章嘗語士禎門人洪昇曰爾師如華嚴樓閣彈指
卽見吾詩如作室者斲甍木石一一就平地築起士
禎亦記於居易錄平心而論士禎詩自然高妙固非

閨章所及而末學沿其餘波多成虛響以講學譬之
王所造如陸施所造如朱陸天分獨高自能超悟非
拘守繩墨者所及朱則篤實操修由積學而漸進然
陸學惟陸能爲之楊簡以下一傳而爲禪矣朱學數
傳以後尙有典型則悟虛實修之別也閨章所論或
亦微有所諷寓規於頌歟其螻齋詩話有曰山谷言
近世少年不肯深治經史徒取給於詩故致遠則泥
此最爲詩人鍼砭詩如其人不可不慎浮華者浪子
叫號者麤人窘瘁者淺癡肥者俗風雲月露鋪張滿
眼識者見之直一葉空紙耳故曰君子以言有物觀

其持論宗旨可以見矣古文亦摹仿歐曾不失矩度然視其詩品則少亞魏禧爲作集序乃置其詩而盛許其文非篤論也

節錄四庫書目
學餘堂集提要

施閏章博綜羣籍善詩古文辭官刑部郎時讞決明敏督學山左有冰鑒之譽轉湖西道參議湖西故荒瘠多盜閏章撫綏有方袁臨閭稱之爲施佛子康熙己未以博學鴻詞薦改授翰林侍講纂修明史以勞瘁卒閏章性仁孝事季父譽如父廣置義田以贍宗戚篤窮交勵後學人咸奉爲楷模

江南
通志

宣城施愚山少孤事叔譽至孝一日值叔誕辰大集

親戚上壽而叔以小故忤意堅臥不起愚山跪榻前
移晷辛亥客都門每憶叔輒涕泗事叔如此古人所
希有也譽有遺詩一卷愚山屬予爲論定序而行之
池北
偶談

瀛校先生學道人也其詩溫柔敦厚有風人之旨
如其爲人徐健庵先生贈序稱先生在湖西時臨
江府城屢築輒壞禱於神越日城成新淦峽江多
虎患先生爲文祝之虎自墜歲旱徒跣呼籲輒雨
其至誠通神率此類余嘗過臨江之使君灘灘由
先生得名益仰清節焉

淵又按侍讀祖名鴻猷字允升郡學生父譽字述
明叔譽號砥園諸生侍讀幼失父爲所育養毛西
河表侍讀墓稱君三世理學又云述明砥園兄弟
孝友內外雍睦江南言家法者推施氏云

米漢雯字紫來號秀巖順天宛平人明太僕萬鍾孫順
治辛丑進士授江西贛州府推官改補建昌知縣丁憂
起復補長葛知縣行取考選主事由大學士李蔚杜立
德馮溥薦舉授編修官至侍講著有始存集

米漢雯明太僕少卿萬鍾孫登辛丑進士歷知長葛
建昌二縣康熙十八年試博學鴻詞科授翰林院編

修漢雯好學工詩兼善小令書畫承其家法當時呼

爲小米

幾輔通志

米進士詩畫皆工秀書法學米南宮徑寸外者尤勁媚或評之曰紫來天才超詣當在友石先生之上入翰林曾典雲南鄉試以事望誤久之

召入供奉

內廷遷侍講

賜第西華門

汪琬說鈴

米紫來漢雯宛平人明太僕友石萬鍾之孫也父壽都字吉士亦知名紫來以順治辛丑登第多技藝工

書畫書仿南宮尤工金石篆刻以長葛知縣行取適有博學鴻詞之舉改翰林編修以典試呈誤久之

召入供奉

內廷遷侍講

賜宅西華門尋病卒太僕有勺園在京城西海淀與武清侯清華園相望亦曰風煙厓今

暢春苑卽兩園故址也紫來所交游皆海內名士與予最相善頗有倡和其詩惜爲書畫所掩亦散佚無

傳矣

王士禛香祖筆記

秀巖爲王文貞崇簡之壻好學多技藝工書畫承其

家法當時呼爲小米九工金石篆刻

鶴徵錄補輯

黃與堅字庭表號忍庵江南太倉人順治己亥進士候選知縣由江寧巡撫慕天顏薦舉授編修官至詹事府贊善著有大易正解易學闡一錄諸經論說月令輯要願學齋集太倉州志忍庵文集

黃與堅己亥進士未就選會以博學鴻詞舉授翰林院編修纂明史未幾復

命分修一統志生平崇尚經術輯解甚多詞賦蓋其餘事所著有易學闡忍庵文集

江南通志

黃君庭表弱冠有名未幾成進士久之僻居海上鬱鬱

鬱不得志會徵天下鴻博之士登薦剡試詞賦稱

旨乃改官翰林在史局慨然有志於班馬荀袁撰志

傳最有體要又修一統志浙江郡縣皆其所裁定所

論辨刊削極精當其操行修潔在京師杜門譙客寂

寂也

節錄澹園文集

忍庵詩長安金陵雜感諸篇頓挫鉤鎖纏綿惻愴在

韓致堯元裕之之間

國朝詩別裁集注

賈崧按贊善以葬親乞歸己卯

聖祖南巡進所著易學闡一錄

賜如松堂額徐健庵尙書嘗序之曰庭表所著經

解失之滇江急湍中今所存者易學聞一錄及諸
經論說一卷而已

李鎧字公凱號惺庵江南山陽人順治辛丑進士授奉
天蓋平縣知縣由內閣中書王穀振薦舉授編修歷官
至內閣學士兼禮部侍郎著有艮齋詩文集史斷讀史
雜述

李鎧少孤力學篤於孝友舉進士後益博綜羣籍歷
知綏陽蓋平二縣皆著循績己未舉博學鴻詞特授
編修分纂明史累擢內閣學士兼禮部侍郎甲申冬
以疾告歸卒生平於書無不窺至老益勤所著有詩

賦及史斷讀史雜述諸編

江南通志

李公凱宰鐵嶺丁憂歸已未以鴻博徵授翰林官閣

學經筵講書理明辭暢當時謂不減范祖禹一生清

節不名一錢門無雜賓嘗語門人云孟子爲卿于齊

終不受祿君祿且然况交際乎守身若此其嚴而彭

更猶以傳食爲泰萬章至比于禦人之貨今人取與

不慎多援孟子交以道接以禮之說以自便其私豈

不謬哉

今世說

徐鉉字電發號拙存又號虹亭晚號楓江漁父江南吳江人國學生由戶部尙書梁清標薦舉授檢討著有南

州草堂集三十卷續本事詩十二卷詞苑叢談十二卷
菊莊詞二卷

徐鉉以布衣舉博學鴻詞授檢討纂修明史尋乞歸
所著詩文膾炙藝苑少刻菊莊樂府朝鮮貢使仇元
吉見之以金餅購去貽詩云中朝攜得菊莊詞讀罷
煙霞照海湄北宋風流何處是一聲鐵笛起相思

通志

虹亭先生爲龔端毅賞識端毅臨歿謂梁真定曰負
才如徐君可使之不成名耶於此見前輩之愛才而
虹亭之見重於端毅實有使之心折者也生平填詞

極工晚歲成本事詩遠地構求比於洛陽紙貴

朝詩國

別裁集注

瀛桉先生少入慎交社聲譽焯起最工長短句嘗
編續本事詩皆緣情綺靡之作而詞苑叢談尤盛
行於世既入翰林會忤權貴意當外轉遂拂衣歸
上南巡兩

賜御書以原官起用不就年七十三卒

賈崧桉檢討少受業於宋既庭徵君門既庭經術
湛深學徒幾以千計檢討獨英英秀絕尤以詩名
江表三十餘年早歲體尚華秀壯遊而後與四方

豪雋相切劘格調一變其自述云新詩學放翁誰
人畫國扇無俟記室品題固可知其得力之所自
矣

沈筠字開平號晴巖浙江仁和人康熙己未進士改庶
吉士由戶部主事黃雲企薦舉授編修著有斗虹集

沈筠有雋才嗜學敦內行嘗刲股肉和藥以療父父
病頓瘳旣而母病亦如之有女弟早寡歲時存恤數
十年無倦容爲文唾地立成而選簡清綺諸子百家
咸集腕下其詩容與閒易以陶徵士爲宗然未嘗以
摹仿傷格也康熙己未成進士改庶常以博學鴻詞

薦試入高等授翰林院編修未久卒所著有斗虹集

八卷

浙江通志

沈筠字開平康熙戊子以博學鴻詞薦是年舉順天鄉試明年成進士皆以經魁其榜

御試復親擢高第授編修纂修明史行醇學博不竟

其用論者惜之

仁和縣舊志

周慶曾字燕孫號毗瞻江南常熟人順治戊戌進士兵部觀政考授內閣中書候補主事由刑部主事俞陳琛薦舉授編修著有硯山遺藁

賈崧按毗瞻本虞仲後世居邑之周墅幼工制義

弱冠補諸生順治戊子舉於鄉戊戌成進士以親
老不赴殿試歸至辛丑父迫之出登馬世俊榜乞
假連丁內外艱壬子補內閣中書戊午薦博學鴻
詞授編修甲子主浙闈卒於公署自吳至浙哭聲
與舟上下平生好行其德鄉試時遇有逋官糧投
河者盡出其金代償之

尤侗字展成一字同人號悔庵又號良齋晚號西堂老
人江南長洲人順治戊子拔貢生除直隸永平府推官
以事降調由兵部尙書王熙工部尙書陳鼐永薦舉授
檢討告歸晉侍講著有西堂雜俎良齋雜記西堂全集

鶴棲堂彙百末詞明藝文志宮闈小名錄

尤侗博物洽聞馳聲藝苑以恩貢爲永平推官鋤強
扶弱緣事罷歸家居二十餘年才望益著康熙己未
舉博學鴻詞授檢討纂修明史未幾乞歸優游林壑
復二十餘年登大耋子珍字謹庸康熙壬戌進士官
翰林世其家學

江南通志

尤侗生而警敏博聞強記有才名歷試不利以貢謁
選除永平府推官不畏強禦坐撻旗丁鐫級歸初侗
所作詩文流傳

禁中

世祖覽而稱善嘗

問其門人修撰徐元文爾江卽年幾何以何事降調當
補何官有意用之不果後以鴻詞纂修明史分撰列
傳三百餘篇藝文志五卷且卅三年告歸家居鍵戶著
書求詩文者無虛日侗亦應之不倦己卯

聖祖南巡至吳侗獻平朔頌

萬壽詩

御書鶴棲堂三大字

賜之癸未

駕復南巡卽家晉侍講明年卒年八十七所著西堂

雜俎良齋雜記及文集餘集共百餘卷並行于世

蘇州

府志

先生名雖未登甲乙榜早爲文社倫魁弟子著錄者
多大學士崑山徐公元文其一也所作詩文流傳

禁籟

世祖惜其才命相妨終受

聖主之知官之翰苑屢承

殊渥今年春彞尊詣杭州偕前輩德清徐公偉謁見
皇太子於行殿

令旨賜坐謂曰老成易謝茲來又失一尤展成矣字

而不名洵異數也

節錄曝書亭集墓志

悔庵作明史樂府雖倣李西涯而往往駕出其上又

嘗作外國竹枝辭百首行世

漁洋詩話

先生所著西堂雜俎傳入

禁中

章皇帝稱爲真才子後入翰林

聖祖稱爲老名士位雖不尊天下羨其榮遇少歲時
專尙才情詩近溫李歸田以後仿白樂天流於太易
雖街談巷議入韻語中遠近或以遊戲視之比於王
鳳洲之評唐伯虎不知四十至六十時詩開闔動盪

軒昂頓挫實從盛唐諸公中出也

國朝詩別裁集注

瀛按康熙甲戌崑山徐尙書健庵先生以三月三日修禊事於遂園東南蒼宿成集共十二人鴻博諸公之與斯會者先生暨黃公庭表與先宮諭凡三人以蘭亭二字爲韻皆有詩紀事先生挈詩僧宗渭至時年八十有二矣禹鴻臚尙基爲之圖尙書故先淑人之曾王父也今圖存余處

范必英原名雲威字龍仙後改今名字秀實號秋濤一號伏庵自號野野翁又稱杜圻山人江南吳縣人明提學參議允臨子順治丁酉順天舉人由庶吉士彭會洪

薦舉授檢討

范必英參議允臨子順治丁酉舉人康熙己未舉博學鴻詞授檢討纂修明史謝病歸儲書萬卷日誦讀其間凡古今經世大典以及詩文源流高下歷歷能指數詩古文詞綺麗雅馴晚喜汲引後進從游多名

儒之士

江南通志

先生字秀實號秋濤一號伏庵初名雲威宋參知政事文正公十八世孫自爲諸生聲籍甚順治甲午拔貢入太學丁酉舉順天鄉試戊午以博學鴻詞徵授檢討纂修明史先生于書無不窺而以五經爲本于

史事尤熟每一篇成咸服其精審既分纂事畢卽謝
病歸自稱野野翁又稱杜圻山人所居芝蘭堂三楹
後萬卷樓藏書遍滿日吟諷其間自得也性固簡默
世務不以櫻懷而學求實用于禮樂政刑邊防漕輓
屯田兵制農桑水利之書無不究其失得善敗可指
數晚喜汲引後進從遊者二百餘人

節錄韓莢有
懷堂集行狀

崔如岳字宗五號雪峰一號青峙直隸獲鹿人明巡撫
應麒曾孫康熙乙卯舉人由監察御史鞠珣薦舉授檢
討著有坐嘯軒瑣言

張鴻烈字毅文號涇原江南山陽人廩監生由兵馬司

指揮劉振基薦舉授檢討以事降級除國子監助教遷大理寺副以憂歸

聖祖南巡鴻烈獻詩復原職

張鴻烈吏部新標子康熙己未舉博學鴻詞特授檢討纂修明史疏請開支河轉漕以避河險又時興殷工採木遠省復有寬期減數之請事悉施行部議以不應密封鐫級除國子監助教遷大理寺副以憂歸後

聖祖南巡過淮上鴻烈迎獻詩賦復原職鴻烈詞藻

豐蔚一時推爲大才

江南通志

方象瑛字渭仁號霞莊浙江遂安人明大學士逢年孫
康熙丁未進士候選中行評博由總督倉場侍郎嚴沆
薦舉授編修官至翰林院侍講晚自號金門大隱著有
錦官集健松齋集健松齋續集松牕筆乘方氏先賢攷
方象瑛少傳逢年孫九歲能詩十三作遠山淨賦登
進士以中書舍人分校戊午京兆試會舉博學鴻詞
試入高等授翰林院編修纂修明史癸亥典試蜀中
盡心甄錄不苟充賦蜀士蒸然一變尋請歸里不復
出苞苴竿牘一不至於門遇有利弊則嶽嶽言之卒
之日闔邑建思賢祠於城南著有健松齋前後集行

世浙江通志

方君渭仁以宰輔之孫早成進士旣而用薦

召試入翰林歲在癸亥四川旣定

詔補省試于是君奉

命遄往歸而刻其詩爲錦官集凡山川之阨塞風土

之同異友朋之離合撫今弔古悉見於詩

節錄曝書亭集

渭仁性簡重天資穎異年十餘時卽能操筆成詩騷

短賦爲鄉國豔傳祖書田少傅尤鍾愛丁未成進士

益發憤讀書日與同好以文章相切劘四方人士翕

然宗之今世說

李澄中字渭清號雷田一號漁村四川成都籍山東諸城人康熙壬子拔貢生由監察御史鞠珣薦舉授檢討官至翰林院侍讀著有白雲村集八卷臥象山房集三卷附錄二卷艮齋文選四十卷滇行日記二卷

安若訥爲作墓志記其夢爲李攀龍後身趙執信亦稱其生而父夢攀龍入室故其詩仍學攀龍龐塏論文絕句則有壽光安子非知己強爲于鱗認後身句今觀其集頗不類滄溟體格是塏所論者爲允若訥執信皆好奇之論也

節錄四庫書目臥象山房集提要

澄中與龐塏交最契詩格文格往往互似塏序稱王

新城阮亭田德州綸霞壇坫久成於時望重龍門漁
村入都與鼎足而立士林稱山左三大家

節錄四庫書目白雲

村集
提要

李澄中工詩文遠近學者宗之由拔貢生應博學鴻
詞授檢討官至翰林院侍讀典試滇南秉公持正所
得皆一時名彥及致仕歸里清白自守足跡不入公
門遇有事關國計民生卽侃侃而談一以興利除害
爲念著有滇行日記臥象山詩集艮齋文選諸書行

世

山東
通志

賈崧按侍讀始爲詩恆廢食飲喜怒哀樂皆寄之

其詩以漢魏人爲宗不屑屑近時習也施愚山云
渭清以諸生被徵擁書臥僧舍不肯干恩達官其
詩多豪逸清遠有類乎閒居之所爲得詩人之風

吳元龍字長仁號臥山江南華亭人康熙甲辰進士授
宏文院清書庶吉士歷工部郎中回籍終養由督捕理
事張永祺薦舉授侍講官至侍讀學士著有問月堂集
吳元龍甲辰進士選庶吉士改主事歷郎中舉博學
鴻詞科授翰林院侍講預修明史奉親以孝聞子廷
揆字賓門康熙癸巳進士歷官太常少卿才望甚著

江南
通志

龐塏字霽公號雪崖直隸任邳人康熙乙卯舉人由刑部主事李模內閣中書張星耀薦舉授檢討改工部主事出爲建寧府知府著有叢碧山房集五十七卷詩義固說二卷

塏爲詩主於平正沖澹不求文飾當王士禎名極盛時能文之士率奔走門牆假借聲譽塏獨落落不相親附故士禎亦不甚稱之

節錄四庫書目叢碧山房集提要

雪崖幼失母氏與諸弟友愛特甚門內之雍睦尤人所難者讀家庭紀懷諸詠淵然肅然使人有自古在

昔之思焉

李澄中筆記

瀛按先生出守建寧會浦城令以嚴苛激變民罷
市先生至召紳士集明倫堂數令罪且諭士民無
得生亂變遂定時制府惡閩俗刁悍欲興大獄先
生曰彼令實甚吾可殺人媚人耶僅坐重罪一人
流二人浦城人立書院祀之九仙山

賈松按學士之先本延慶府大寧衛軍籍始祖永
資以百夫長受田河間之任邨遂爲任邨人三傳
至松年百一歲稱百一公父諸生克慎私謚貞文
王士禎墓志云貞文天性孝友將析產盡讓膏腴
不取而自擇其磽者甘旨之奉則身任之不以責

兄弟雪崖致政歸里時尙具慶閉戶讀書卒年六十有九

毛奇齡一名甦字大可號秋晴一曰初晴又以郡稱西河浙江蕭山人廩監生由浙江巡撫陳秉直薦舉授檢討著有西河合集四百九十三卷

奇齡之兄錫齡邃於易而未著書惟時時口授其子文輝後奇齡乞假歸里錫齡已卒乃撫文輝所聞者以己意潤飾成是書或傳奇齡假歸之後僦居杭州一日著一卦凡六十四日而卦成雖以其兄爲辭實卽奇齡所自解以理斷之或當然也

節錄四庫書目
仲氏易提要

毛奇齡蕭山諸生入太學舉博學鴻詞授檢討纂修
明史乙丑會試充分校官尋以葬親告歸遂不出年
九十四終奇齡當明末葉有盛名及

召試年已遲暮時同入館者五十人皆文學老儒而
奇齡與宜興陳維崧尤卓傑海內稱爲毛陳大學士
李天馥以奇齡詩擬之少陵文擬之韓吏部學擬之
孔穎達陸德明輩而奇齡所自負者獨在經學其解
經多與宋儒柄鑿平生持論喜事功厭空談數稱東
漢人行誼謂足見人真性情學士守成見者徃徃聞
而驚之然奇齡於九經四子六藝易及禮學經曲律

呂諸事皆能極根柢而貫其枝葉非苟然者天性樂
易篤友朋好獎成後進遇有一得津津不去口或疑
其歷詆古人負氣難下及親見風采輒爽然出意外
奇齡名號凡數易人多稱爲西河先生云

紹興府志

西河少負才縱橫爲詩歌古文又好臧否人物意稍
不合卽不少假顏色人皆恨切齒有欲殺者旣遭亂
不應試閒效元人作小詞雜曲以自娛怨家摘其語
以爲謗訕按驗無實得不坐仇者憤無所洩乃欲藉
他人事構之死籍捕四出則跳身之齊之楚之鄭衛
梁楚重繭複壁曼嘯長吟往往託之美人香草以爲

其幽憂騷激之思過淮陰於張吏部園亭倚醉扣槃
賦明河篇六百餘言及旦則城中鈔寫殆遍節錄詩鈔小傳
西河湛深經學著述等身在

國朝可稱多文爲富者唯攻擊宋人不遺餘力至鐫
書若干卷以示旗鼓所以不得爲醇儒藝林惜之

國朝詩

別裁集注

瀛按先生之亡命也過無錫實主余家時先宮論
方以翰林罷歸家富藏書先生因盡得書讀之而
左與樂天先生保寅善詩篇酬答見於西河集中
平生高自誇詡好詆宋儒全謝山祖望作毛檢討

別傳多所其非然記問淹洽博極羣書浙東之學者未能或先也

錢金甫字越江江南上海籍華亭人康熙己未進士授庶吉士榜名金甫中後復姓由戶部主事邵延齡薦舉除編修官至侍講學士著有保素堂集

金甫華亭人父昶有行義鄉里推長者金甫康熙己未進士授庶吉士又以博學鴻詞卽日除編修蓋異數也典試江西有知人鑒歷遷侍講學士卒官少負才藻工詩古文名盛一時尤篤師友之誼多陰德有

保素堂集

江南通志

言才金 卷三 三
賈崧按越江學士之聲武進楊述曾雍正乙卯舉人乾隆丙辰舉鴻博未第中壬戌榜服歷官至侍讀學士越江女賢而多才著有繡餘吟草

吳任臣字志伊一字爾器初字征鳴號託園浙江仁和人廩生由內閣中書王穀振薦舉授檢討著有周禮大義禮通春秋正朔考辨十國春秋山海經廣註字彙補託園詩文集

任臣以歐陽修作五代史於十國倣晉書例爲載記每略而不詳乃採諸霸史雜史以及小說家言並證以正史彙成是書凡吳十四卷南唐二十卷前蜀十

三卷後蜀十卷南漢九卷楚十卷吳越十三卷閩十
卷荆南四卷北漢五卷十國紀元世系表合一卷地
理志二卷藩鎮表一卷百官表一卷其諸傳本文之
下自爲之註載別史之可存者蓋用蕭大園淮海亂
離志楊銜之洛陽伽藍記宋孝王關東風俗傳王邵
齊記之例劉知幾史通補註篇所謂躬爲史臣手自
刊削除繁則意有所悛畢載則言有所妨遂乃定彼
榛楛列爲子註者也其間於舊說虛誣多所辨證如
田頽擒孫儒年月則從吳錄而不從薛史呂師周奔
湖南年月則從通鑑而不從九國志南唐烈祖世家

則從劉恕十國紀年及歐史而不從江南野史吳越
備史皆確有所見其他類是者甚多五表考訂尤精
可稱淹貫惟無傳之人僅記名字列諸卷末雖用陳
壽蜀志附載無傳諸人之例然壽因楊戲有季漢輔
臣贊故繫之戲傳之末非自列其名字於中虛存標
目也是則貌同心異不免於自我作古矣

節錄四庫
書目十國

春秋
提要

是書因郭璞山海經註而補之故曰廣註於名物訓
詁山川道里皆有所訂正雖嗜奇愛博引據稍繁如
堂庭山之黃金青邱山之鴛鴦雖販婦傭奴皆識其

物而旁徵典籍未免贅疣卷首冠雜述一篇亦涉冗
蔓然椅撫宏富多足爲考證之資所列逸文三十四
條自楊慎丹鉛錄以下十八條皆明代之書所見實
無別本其爲裨販誤記無可致疑至應劭漢書註以
下十四條則或古本有異亦頗足以廣見聞也舊本
載圖五卷分爲五類曰靈祇曰異域曰獸族曰羽禽
曰鱗介云本宋咸平舒雅舊彙雅本之張僧繇其說
影響依稀未之敢據其圖亦以意爲之無論不真出
雅與僧繇卽說果確實二人亦何由見而圖之故今
惟錄其註圖則從刪又前列引用書目五百三十餘

種多採自類書虛陳名目亦不瑣錄焉

節錄四庫書目山海經廣

註提要

吳任臣爲諸生試輒冠其曹其文流傳人口然非其好也耽書玩古多所論著嘗撰一書補梅氏字彙之缺廣郭景純山海經注又刺取唐季諸霸國事爲十國春秋凡若干卷戊午舉博學鴻詞授翰林院檢討充纂修明史官未幾卒

浙江通志

吳志伊志行端慤博學而思深兼精天官奇壬之術射事多中時人比之管郭亦精樂律于市上見編鐘一枚叩之曰此大呂鐘也後滌視欵識云古大呂之

鐘嘗與吳錦雯會飲馬鳴允許錦雯問鄒殿二字何
讀志伊曰殿也同本秦權古文鄒許同本說文長箋
錦雯歎服

今世說

項墉按檢討爲諸生時以經史教授鄉里束修所
入就市閱書出善價購而藏之平生著述最富其
山海經廣註以郭注列於前而以任臣案攷訂於
後較楊升庵補註援据廣博多所訂正

陳鴻績字子遜浙江鄞縣人順治丁酉舉人除江南睢
寧知縣由監察御史黃斐薦舉擢檢討僅十二日而卒
陳鴻績幼博涉經史於儒先理學之旨尤根極底與

順治丁酉魁於鄉授睢寧令清儉自持愛民重士雕
民德之康熙丁巳夏運河衝決估修費八千金鴻績
身先工築力障狂流止費金三百閱四十日旋復底
定河臣具疏褒獎己未同里御史黃斐舉爲博學鴻
儒應徵試詩賦中選授翰林院檢討時同舉者有徐
懋昭字仲協康熙甲辰進士授沛縣知縣素以淹雅
工詞翰斐并薦之以病不能終卷回任

寧波府志

曹宜溥字子仁號鳳岡湖廣黃岡籍江西東鄉人蔭生
侍讀學士本榮子由湖廣巡撫張朝珍薦舉授檢討

鳳岡爲學士本榮子朱竹垞有餞曹檢討詩云曹子

酒戶大十榼飲不休可見其豪

李鎬筆記

毛升芳字允大號乳雪浙江遂安人康熙壬子拔貢生
由戶部主事方元啟薦舉授檢討著有古獲齋駢體竹
枝詞

允大天才敏麗詞賦詩歌滔滔不可窮止尊人穎思
君與余共筆墨最久穎思文章有奇氣允大繼之人
比之眉山父子今

天子詔舉文學之士允大名列薦剡子虛上林且優
爲之邛壑之觴詠何足與較遲速哉

方象瑛松
窓筆乘

乳雪天才敏異五歲時見王子安滕王閣序元微之

連昌宮詞便朗朗成誦音韻鏗然觀書數行兼下爲
文頃刻千言塾師督舉子業甚嚴每乘暇竊取詩古
文默識之

李澄中
筆記

賈松按檢討與修明史嘗以名義至重鬼神難欺
八字自警

曹禾字頌嘉號峨嶠江南江陰人康熙甲辰進士授內
閣中書舍人由大學士李蔚杜立德馮溥同薦舉改編
修官至國子監祭酒著有峨嶠集

曹禾甲辰進士官中書舍人舉博學鴻詞歷官國子
監祭酒詩古文皆有名有文集行世

江南
通志

曹子頌嘉生長吳會以古學堅苦自力曹子之志所欲疏通發明而見之文字者由六經而下及於西京以後之書無所不讀既粹然一出于正而其邁往恣肆之氣仍寓於規行矩步之中故視近世之所謂株守繩尺者岸然不屑也閒以其餘力爲詩則駿駿乎軼大歷貞元而上之會

天子下詔求博學鴻詞之彥備左右顧問執政素知嵒嶠遂以其名上是舉也當宁必將一見而有宣室之問延英之訪則豈獨斯文之興也有日哉

節錄澹園文集

余識其孫全倫清門零落矣旣全倫旋歿訪其詩不

能多得爲之懽然

國朝詩別裁集注

黎騫字子鴻號瀟僧後字瀟雲江西清江人順治甲辰拔貢生由監察御史鞠珣薦舉授檢討

騫父名祖壽前癸丑進士南吏部郎中入祀鄉賢督學元寬爲騫從祖亦臨江世族也

李錯筆記

高詠字阮懷號遺山江南宣城人歲貢生候選知縣由監察御史鞠珣薦舉授檢討著有遺山堂若巖堂等集高詠幼有神童之目其學無所不窺書畫與詩世稱三絕康熙己未以博學鴻詞

特授翰林院檢討充明史纂修官所撰史彙皆詳慎

不苟著有若巖堂集

江南通志

高阮懷少時常夢于市上行見幅字狼藉不敢踐尋側路行不覺輕舉入雲中見樓閣壯麗心知其爲天庭也方疑懼有導行者引至文昌宮命之曰姑坐此驚而寤作飛龍引紀之後以薦舉授史官數年復夢前境心惡之引疾歸里起居如常每語人曰當以二十八月辭世而究不言其故次年二月卒果二十八日也

曠園雜志

論者謂已未薦舉諸君文章之爾雅不必言而難進易退立意較然其高風亮節亦豈長安冠蓋中所易

觀擬之天半朱霞可望而不可卽如阮懷者庶可當
此言而無愧矣

節錄詩
鈔小傳

賈崧按檢討與同里施閨章梅杓司友善過從無
虛日非是卽剥啄頻聞不應也弱冠爲諸生屢試
第一應鄉試前後十五不中年近六旬始以貢入
太學時崑山徐公元文爲大司成延之家塾一日
酒間公舉觴屬曰先生早致盛名余甫就傳願一
見顏色不可得幾作天外人想今不意屈致門下
敬爲先生壽先生唯唯取酒立盡不作遜讓語又
數年入翰林未幾以老病去官卒潘耒挽詩有云

垂老一官榮地下酷貧佳句滿人閒實錄也

龍燮字理侯號石樓又號雷岸江南望江人廩監生候
補州同由內閣中書王振穀薦舉授檢討官至中允

龍石樓中允作瓊花夢傳奇成招余輩觀之余酒闌
賦八絕句有自掐檀痕親顧曲江東誰似阿龍超之
句門人蔣靜山仁錫和云玉崑崙碎爲檀超余歎曰

蔣五此押檀場矣

王士禎漁
洋詩話

邵吳遠字戒三號戒庵浙江仁和人康熙甲辰進士榜
名吳遠改歸本姓名遠平初選翰林累遷光祿少卿由
江西巡撫佟國楨薦舉授侍讀官至詹事府少詹事著

有戒庵詩存京邸粵行等集續宏簡錄自著年譜

京邸集自序謂己未再入京五載內所作多典禮紀
頌之章酷摹唐音頗見宏瞻長洲韓莢序謂其使粵
時唱酬甚富別爲集以行於世則此卷乃其全集之

一種耳

節錄四庫書目
戒庵詩存提要

邵遠平甲辰進士選庶吉士改戶部主事壬子順天
同考官除江西提學葺白鹿書院大興文教擢光祿
寺少卿會舉博學鴻詞試入等仍授翰林侍讀與修
明史辛酉典試廣東轉庶子充日講官歷遷詹事府
少詹事兼侍講學士與修一統志致仕歸初遠平高

祖經邦當明世宗朝以議禮廷杖謫戍於戍所著宏道宏簡宏藝三錄遠平歸田後息影湖莊杜門謝客著續宏簡錄四十二卷子錫章錫光同中丙戌進士

浙江
通志

嚴繩孫字蓀友號蕩漁江南無錫人布衣明司寇一鵬孫由刑部主事俞陳琛薦舉授檢討遷中允請假歸著有秋水集詩八卷詞二卷文七卷

嚴繩孫六歲卽能作徑尺大字以詩古文詞擅名早棄諸生舉博學鴻詞力辭不獲試日賦一詩而退

聖祖特命授檢討蓋異數也在明史館纂隱逸傳容

與蘊藉蓋多自道其志行云著秋水集二十卷子泐

曾善畫工詩

江南通志

君讀書不務強記案上惟置一編終日不易他書或數日纔一易既讀終身不忘爲文宗先秦兩漢尤近范蔚宗詩冲融澹易閒雅深秀如其爲人弱歲能徑尺大字晚於細楷尤工閒作小畫寸縑片紙爲時珍賞葉侍郎訥庵嘗言君二十餘棄諸生優游環堵終年嘯傲無動乎其中亦無炫乎其外通國之人皆高其行而君初不自知侍郎爲君布衣交其言信而有徵君見俗儒緣飾外貌高談性命輒薄之嘗語人曰

吾一生所見真道學惟睢州湯潛庵先生一人其志趣如此君有墓田在邑西洋溪之上溪有橋曰蕩蕩

因自號蕩蕩漁人

節錄蒼峴山人集本傳

蓀友爲貴公子孫早歲拂衣蕭疎澹遠脫然塵埃之外識者目爲倪元鎮一流詩篇意象超越不爲綺靡之音摘其一二語猶當遺世獨立也

徐鉉南州草堂集

瀛按先生齒長於先宮諭論兄弟交先宮諭早貴而先生以布衣晚遇被

聖祖特達之知旋告歸早歲與先宮諭唱和碧山有嚴秦唱和詩集黃漢臣先生家舒序之後同纂

明史又同日拜

命充日講起居注官先官諭詩云何期山館聯吟
客又作螭坳對立人蓋紀實也子泓曾工詩書畫
著有青梧集論者比之庾肩吾父子嘗寫碧山吟
社圖贈王文簡文簡爲題五言律詩又采其詩入
感舊集惜以病廢年亦不永

傳畧

三 特賜同博學鴻
儒科在南書房考試

高士奇字淡人號江邨浙江錢塘人監生以

御試鍾王書法授內閣中書直南書房

賜同博學鴻儒考試庚申授侍講累官詹事府詹事加

禮部侍郎兼翰林院學士謚文恪

瀛校文恪以能書入直

內廷渥被

恩眷嘗爲都御史郭公琇所劾相傳文恪嘗屬健庵徐公以扈從

東巡錄丐序於先宮諭未應徐公乃自爲之文恪銜先宮諭甚甲子順天科場之獄皆文恪密爲主之第其事秘不著耳

勵杜訥字近公直隸靜海人以

御賜試鍾王書法直南書房

賜同博學鴻儒考試庚申授編修累官禮部左侍郎贈
尚書加太子太傅諡文恪